



Tir Yimyim

www.tiryimyim.in

Regd. No. RNI. NAGAAO/ 2004 / 13113. Postal-NE/RN-717.

e-mail : tiryimyim@gmail.com

TAPAK 7

Yangia anidakangma :



Tir Yimyim



tir_yimyim



tir yimyim

TAPAK 8



Gaza indang 'board of peace' nung Netanyahu adentsü

Mitchell-i Kohli ajateta No.1 ODI batter kumogo



VOL. XXIII ISSUE NO. 99 (ADOK 99) DIMAPUR YANGTEPNÜ (THURSDAY) AENJETI (JANUARY) 22, 2026

₹ 5.00

WSH aser WSKH-i khukhua aitsür

Dimapur, January 21, 2026 (TYO): Prangpong amer nisung pur aoba aser sen meshiba inyakyimtem khukhua aitsür ta Western Sümi Hoho (WSH) aser Western Sümi Kukami Hoho (WSKH)-i metetdaksüogo.

Tawa NSCN/GPRN (Khango/Hokato Vusshe) ajanga Vikhuo Village nung Head GB Kiyeto Zhimomi pur aoba aitsür. Yimtsüng bangdakpur ka aser local entrepreneur ka dak tenük yoka inyaksangshiba ya tebilemtsü tulu ka lir aser iba ajanga ozüng maliba sayur ta WSH aser WSKH külem sangdong ka nung ashi.

"Kiyeto Zhimomi chiokogo saka pa dak inyakba ya kanga dang süoki aitsü tatalokba ka lir aser khenyong magizüker. Iba ken o ya customary, civil aser legal mechanisms ajak nung ajemdaker bushitsü aser kija mesüra telok kar danga aibelenba putetra parnoki tebilemtsü khuret ajunga abentsü" ta WSH aser WSKH ajanga ashi.

Naga entrepreneurs aser lokti lennirtem sen yong apuba ya pei nübor anema tesempatsü mapa inyakba lir. Local entrepreneurs ya asen loktiliba nung tongtired ama lir saka parnok dak mapang shia tenük yoka inyaksangshiba ajanga tangatetba agi anüngba sayur. Kija mesüra telok kari Naga yimten tebilemtsü tenüng amer senotsü ajangzüksü asoshi

civilian tem timtem agütsüba ya ozüng alema inyakertem lir ta WSH aser WSKH-isa metetdaksüogo

Onok telongtet nung nisung apuba, tashiyim agi sen meshiba aser prangpong amer tashiyim inyakba magizüksü. Naga loktiliba prangpongtem mesüra tashiyim agi sen meshiba ajanga timtem mesüdaksütsü ta parnokisa shiogo.

Y. Patton-i DGP nem tetuyuba agütsüogo

NSCN (K) Khango-Vusshe teloki arishi küm 56 tain businessman aser transporter Kiyeto Zhimomi pur aoertem maitsü jangjatsü atema Nagaland DGP Rupin Sharma nem tetuyuba agütsüogo ta Deputy Chief Minister & Home Minister Y. Patton-i ashi.

Sorkari iba mapa inyakertem dak tapet mapa inyaksü aser tang nungi ibala tatalokba magizüksü ta Y Patton-isa ashi.

Paisa telungpur telok ajak dang lokti anema inyakba mapatem anentsü aser Ceasefire Monitoring Cell-i ozüng alema amshiba prangpong aser injangtem sota ayutsü mepishia metetdaksüogo.

Ceasefire Monitoring Chairman den ceasefire ground rules alema inyaksangshiba onük benoka lemsateptsü aser state cabinet-ia tekaraba nung iba atema lemtet kar agitsü ta Y Patton-isa ashi.

Union MoS B L Verma-i Nagaland semdang



Union MoS B L Verma

Dimapur, January 21, 2026 (TYO): Centre sorkari Northeast aser idaki aliba nübortem azükarutsü aser renloksü atema tenangzükba lir ta Minister of State for Consumer Affairs, Food & Public Distribution and Social Justice & Empowerment, B L Verma-i ashi.

MoS Verma-i anogo ananü atema Nagaland semdangi arua lir aser pai Chumoukedima district kübok tang teinyakdak mapatongtem reprangdanga senzüogo.

Pai Unity Mall, Anganwadi centers aser Christian Institute OfHealth Sciences and Research (Referral Hospital) nung Centre for Disease Control and Cancer treatment yangluba tesemtem sema senzü.

"Nagaland nung tesüiba küm ter tsüngda temelenshi kanga liogo. 2014 nungi sorkari rural roads aser national highways talila yangluogo aser iba ya Northeast ajungalen inyakogo.

Northeast nung airport capacity anasü agi teimba kumogo aser state ti nungi tenet tashi rail connectivity sütetogo" ta Verma-i ashi.

Pai taoba mapang Minister of State for the Ministry of Development of North Eastern Region (DoNER) aser Ministry of Cooperation inyakogo aser Northeast state ti meteta lir ta ashi.

Prime Minister Narendra Modi kübok Northeast kanga melenshiogo. Item state ya 'Seven Sisters' dang masü saka 'Ashta Lakshmi' lir. India linük renlokba nung Northeast ya tongtipang kishizüng ka lir ta Prime Minister-i lateta lir ta MoS Verma-isa metetdaksü.

Nagaland nung beneficiaries lakh 14 temai ita shia angati rations angur aser iba nung Antyodaya aser PM Garib Kalyan Anna Yojana dena lir. Nagaland nem jang 11,000 metric tons shi lemzüksür ta paisa ashi.

"Social Justice & Empowerment Ministry kübok Northeast tesem balala nung Persons with Disabilities (PwDs) asoshi camps 326 tashi ayongzük dang Rs 44 crore endokogo. Nagaland nunga tang tashi nung camps 31 tashi ayongzükogo aser iba nung nisung 935 shi ajangzükogo" ta Verma-isa shisem.

"Linük nung UDID cards agütsüba den camps 19,500 tashi

ayongzükogo aser nisung lakh 33 tema nem motorized tricycles, tricycles, walking sticks aser hearing aids agütsüogo. Northeast region nung UDID cards 3,28,874 yangluogo aser Nagaland nunga UDID cards 3,884 agütsüogo aser iba nung Rs 52 lakhs endokogo" ta paisa metetdaksü.

ADIP scheme kübok onoki Northeast nung PM Divyansha Kendras 10 lapokogo aser ka Dimapur, Nagaland nung lir. Tang nübortemi camps atatsü nüngdak madoker saka Kendras-i oa check-up asür aser idangjisa teyari angur ta paisa shisem.

"Ministry-i Northeast nung Divyang kaketshir nem Rs 5 crore scholarships agütsüogo aser iba ajanga kaketshir 1,383 ajangzükogo. Nagaland nem Rs 2.60 lakhs agütsüogo aser iba ajanga kaketshir 40 ajangzükogo. Onokisa Divyangian asoshi skill development indang tajangzük agütsür. Iba amaji centre ajanga Nagaland nem Rs 1.15 crore agütsüogo aser nisung 192 tajangzük nguogo" ta MoS Verma-isa metetdaksü.

Osangbenertemi beneficiary shia nungi jang seret 1 katizükba atema asüngdang dang "kibong shinga dang nungia jang katizüka mayutsüla. Onoki ochimashi magizüksü aser ibala mapa inyakba ration dealer dak tapet mapa inyaksü" ta Verma-isa langzü.

Nagaland-Japan Connect 2026 ayongzüksü

Kohima, January 21, 2026 (TYO): Nagaland sorkari Centre of Excellence for Foreign Languages (CoEFL) aser tanga tongti rejutem den yaritepa Nagaland-Japan Connect 2026 ayongzüksü.

Sorkar tenüng nung Investment and Development Authority of Nagaland (IDAN)-i mapa ketdangsüa inyaksü aser Nagaland o Japan tsüngda tesentaktep akangshiteptsü.

Chief Minister Neiphiu Rio-i anir teshimtet telok kati Japan semdangba ajanga Nagaland-Japan Connect 2026 ya ayongzük. Iba mapang Japan sorkar tongti ketdangsürtem, taoba Ambassador of India to Japan, aser Japanese company tulutem den ajurutepa sensaksema liasü.

Nagaland-Japan Connect 2026 ajanga Nagaland aser Japan tsüngda Government-to-Government tesentaktep tenzüksü.

July 2025 nung Kochi Prefecture, Japan nung Memorandum of Understanding

(MoU) ka nung sign sütepba ajanga tesentaktep yanglua liasü. Iba ya human resource exchange, agricultural technology collaboration aser future strategic partnerships atema agiba liasü.

Iba MoU kübok tongtipang mapa kaji Nagaland University nung Centre of Excellence for Foreign Languages (CoEFL) lir. Naga lanurtem bendanger oshitem angazüksü, sobaliba agizüksü aser mapa inyaksü maongkatem angutsü atema CoEFL lapok.

Iba centre nung language partner, ARMS Incorporation ajanga mezüngbuba foreign language benokbaji Japanese lir.

Nagaland-Japan Connect 2026 ajanga Nagaland nungi trained youth asoshi mapang shitak nung maongkatem agütsütsü.

Iba sentong ya tarutsü nungbo Nagaland annual calendar nung teti alitsü aser iba ajanga international cooperation akangshitsü alizüng lir.

Dr. Neiphiu Rio-i Gujarat media nisungtem den sensaksem



Dimapur, January 21, 2026 (TYO): January 21, 2026 nü Chief Minister Dr. Neiphiu Rio-i Gujarat nungi media teshimtet telok ka den ajurutepa sensaksemogo.

Chief Minister's Residential Complex, Kohima nung CM Rio-i Gujarat nungi aruba media nisungtem den Nagaland osang lemsatet.

Nagaland putiotsü, tayongzükbatem ajuruba, rongsenketzüng jenjang, lokti tebilemtsütem aser Indian Constitution nung state atema latet balaka aliba indang pai metetdaksü.

"Nagaland nung factories aser industries maliba agi investors marur aser iba ya Indian

constitution nung Arrla 371(A) ajanga lir. Iba nung ali aser rongsenji nübor meyong ta shia lir aser iba tetezü bendangertemi Nagaland nung ali alizüksü memelar. Bendangertemi küm tezüngzük atema dang ali lease nung agitsü akok" ta CM Rio-i ashi.

Nagaland nung Khristan yimsü aser shisaliok aruba ajanga tanübo Naga lanurtem India nung dang masü saka tanga linüktem nunga inyaker. Indian constitution nung special status ajanga ali rongsen magiteteter saka Naga nung human resources amshitetsü ta paisa metetdaksü.

Japan sorkari teyari agüja

JICA project inyaker aser tesüiba küm ishika Japanese nunger den tesentaktep tajung lia arudar ta CM Rio-isa ashi.

Gujarat nung media nisungtemi Nagaland tali tejangjiba metettsü aser Nagaland o Gujarat tsüngda tesentaktep akangshitsü atema iba sentong ya agir.

Iba tour programme ya Press Information Bureau, Ministry of Information & Broadcasting, Government of India ajanga ayonga agir.

Gujarat nungi media house balala nungi media nisung 15 aser PIB ketdangsür anati anogo pezünü- January 19 nungi 22, 2026 tashi Nagaland semdangi arua lir.

MLA Kikon-i Meluri nung jana indokba tebilemstsü asadanga jaja



MLA Achumbemo Kikon den Deputy Commissioner, Meluri, K. Mhathung Tsanglao aser Advisor, New & Renewable Energy & NSDMA Nyusietho Nyuthe aser ketdangsürtem noksa nung angur.

Dimapur, Aenjeti/January 21 (TYO): Environment and Climate Change Committee chairman aser MLA, Achumbemo Kikon-i Deputy Commissioner aser Meluri Town Council ketdangsürtem den senden ka mena Meluri nung sanitation aser jana indokba tebilemstsü indang jembia liasü.

Alima tzü-mopung melenshiba ya tarutsü tebilemstsü masü saka tang Nagaland nung kongshiba tebilemstsü lir aser aji koktettsü atema ajak lungjemer inyaksü nungdaker, ta Kikon-i iba senden nung ashi.

Pai Antalya, Turkey nung COP31 - 2026 United Nations Climate Change Conference agitsü aliba indang lemsatep aser alima tzü-mopung melenba azüoktsü asoshi alima rangben

amalitep akatsü nungdaker ta ashi. Asenok COP31 asoshi renemba mapang mokozi tamajung adokdaksüba ajemtsü aser tzü-mopung melenshiba ama asenoki litettsüsa asenoki inyaksüla, ta ashi.

Kikon-i lenirtem dang nüburtem nem angatetdaksütsü aser temeket yimtsüngtem asoshi tatishitsü tajung sayutsü ayongzüka liasü.

Sanitation ya Town Council küboki aiter anünung, ketdangsür temi jana bendenba bongdang yutsüba, jana lemsaba aser tim yimya nung indokba nung rangloksüla, ta ashi.

MLA Achumbemo Kikon-isa jila nung jana indokba tesem semdanga liasü aser ketdangsürtem dang jana

bendangtsü aser processing facility atema tesem bushitsü shia liasü.

Iba mapang ketdangsür temi Kikon dang parnoki timtem ajuruba, nübu agi anüngba, gari ajema aliba, jana bendangtsü tesem maliba aser senotsü teyari menur anguba indang lemsatepa liasü.

Meluri nung treatment facilities maliba ajanga sen aika indoka solid waste tem bener aor aser jila nung nisung indang jana asoshi cesspool facilities mali timtemer, ta parnoki ashi.

Lenmang mesüba ajanga colony aika nung jana bendenba gari mesenzütetba indanga parnoki lemsatepa liasü.

Kikon-i Municipal Affairs Department den item tebilemstsü lemsateptsü ta ashi.

Nokhu nung Khaozaosie Hok-Ah cum Mini Hornbill benjongmung tembangogo



Noklak district kübok Nokhu yimdak Khaozaosie Hok-Ah cum Mini Hornbill benjongmung amungdang Thang Range Public Organization ajanga shilem agiba noksa nung angur.

Dimapur, Aenjeti/January 21 (TYO): Government of Nagaland teyari nung Khamniungan Tribal Council ajanga Noklak district kübok Nokhu EAC Hq. nung ayongzüka 5 buba Khaozaosie Hok-Ah cum Mini Hornbill benjongmung January 21, 2026 nü tembangogo.

Sentong akhumdong ka ama Eastern Nagaland Peoples' Organization (ENPO) tir, A. Chingmak Chang-i jembidang, state sorkari Frontier Nagaland Territory (FNT) atema kishi lapokja Centre dangi recommendation yok, ta ashi.

Küm aika FNT khanga aruba sülen tang iba tejangraba asangsang akumtsü anasai arutar, anungji anüdoklen aliba Naga nunger ajungai maneni

iba atema sarasademtsüla, ta pai ashi.

Chang-i Noklak district nung aliba sorkar ketdangsürtem dang Deputy Commissioner lenisüba kübok ajaki district terenlok aser tejakleni aotsü asoshi teyakyak shilem agitsü ayongzüka aser Noklak district nung aliba nüburtem dang terenlok maparen ajunga nung ketdangsürtem den amalitep akatsü ayongzüka liasü.

Khaozaosie Hok-Ah cum Hornbill Festival 2026 nung salem lemsatepba mapang, iba benjong ya ajanga tesüba mapang mangatettep aliba amadoktsü aser tatok agütsütsü, tamang katap tenzüksü, telungjem nung tashi itshitsü asoshi sapang ka ama asütsü imlar, ta Chang-i ashi.

Benjong host MLA, P. Longon-i o tatsüka jembidang, iba benjong amungdang nüburtem kati ka dak tamang katapa Khamniungan kin telungzüka nung aser danga kin den telungjem nung tashi itshitsü ayongzüka liasü.

Kin balala aser Naga nunger tsüngta telungjem adokdaksütsü nükjidong nung state sorkari kin balala benjong anir amunger, ta pai ashi.

Deputy Commissioner, Noklak, Mono Khamniungan-ia iba sentong nung benjong salem lemsatep aser sobaliba tajung wazüka ayutsü ayongzüka liasü.

Iba benjongmung nung washitepba, arr atsütepba, lasangjang khashitepba aser sobaliba tsüngsangtem nung tetoktepba ayongzüka liasü.

Kiyeto Zhimomi pua bener aoba DALT-i aitsür

Dimapur, Aenjeti/January 21 (TYO): NSCN (K) Khangovusshe telok nungi züngsem temi January 19, 2026 nü Chümoukedima district kübok Mishikito village nungi shishilempar nisung tejangja, Kiyeto Zhimomi, Head GB Vikhuo Village pua bener aoba khukhua aitsür, ta Dimapur Ao Lanur Telungjem (DALT) sangdong ka ajanga ashi.

Nagaland nung aliba nüburtemi yimjung aser terenlok aginüa aliba mapang ka nung iba ama koda masü atalokba ajanga kanga meinpronger, ta ashi.

Senso ka pua bener aoba ya mapa tamajung inyakba kisung masü saka nisung tsübokdaksüba tazü mapa ka lir, koba ajanga timtem balala nungi nübur kumzüka ayuba indang-indanga amokmerener aser asen lokti tenüng menüksür.

Iba ama inyakyim yagi nüburtem temulung nung tetsübo aitaidsü aser lokti tesendaktep tajung aliba nung kongshir.

Kiyeto Zhimomi chiokogo ta angazüka DALT temulung anisüngzüker, ajisüaka kecha tensa nunga ozüng alema inyaksangshiba kodanga temeden magütsütsüla. Iba

tatalokba ya state nung security environment ajunga atema tekum dangtsü tulu ama ajiteter.

Iba yagi shishilempar aser nüburtem nem tangatetba tai agütsür, shirnok asentzü sena aser ochishia alitsü meranger aser state indang rongsenketzung aser terenlok nung shilem agir, ta DALT ajanga ashi.

DALT-i ajak dang pua bener aoba, tashiyim amshiba, amokmerenba mesüra ozüng alema inyaksangshiba nungi pila alitsü ayongzüker. Tejakleni aoba lokti ka nung iba ama inyaksangshitsü memelar, koba ajanga maksü, nüburtem nem timtem dang bener arutsür.

DALT-i sorkar aser ozüng amshiba agency balala dang iba tatalokba angatettsü aser nüburtem tesunep nung lidaksütsü asoshi nungdakba mera agia tarutsü nung iba ama matalokdaksütsü ayongzüker.

Maneni tangatetba shidak aliba nübur aser lokti tentet balala dang iba ama tatalokba anema lungjemer nokdaksü ayongzüker, ta ashi.

Nüburtem sunepa, tiptema aser lendong timtem balala nungi kumzüka yimjung nung alitsü asoshi inyaksü tangatetba nung DALT nokdaka lir, ta sangdong ajangasa ashi.

Kohima DPDB senden nung terenlok mapa balala asadang

Dimapur, Aenjeti/January 21 (TYO): Ita shia amenba Kohima District Planning & Development Board senden January 21, 2026 nü DPDB Conference Hall, Kohima nung MLA & Chairman, DPDB Kohima, Kevipodi Sophie lenisüba kübok mena liasü.

Iba senden ya Deputy Commissioner & Vice Chairman, DPDB Kohima, B. Henok Buchem, NCS-i ketdangsüa amen.

Senden tenzüka Chairman, DPDB Kohima, Sophie-i züngsem tem pela agizük aser department balala dang nübur tenzüka nung tali bendanga agütsütsü ayongzüka liasü.

Taoba küm takok anguba kar lir aser ajak lungjemer inyakba ajanga taküm terenlok tuluba alitsü imlar, ta pai ashi.

Senden nung society pezü - Rhodo Realm Academy, Middle PWD Colony, Kohima; Joint Forum Equity, Botsa; Sunrise Shuttles Badminton Club, Khikha, Rüliezou, Kohima; aser Nagaland Police CSR & Security Board, P.R. Hill, Kohima ajanga parnok nükjidong aser inyaksangshi lemsatep aser iba sülen senden nung züngsem temi kanga junga asadanga jembishinüba sülen parnok registration agizüka tim ketdangsür dangi nungdakba mera agidaksütsü atema yok.

Horticulture Officer, Mhasi Yashü-i Department of Horticulture indang scheme aser sentong balala inyakba osang agüja liasü. Iba mapang Mission for Integrated Development of Horticulture

(MIDH) kübok süngjang-lijang aser aonsotsü ali nung yoktsü asoshi osettsüset aser metsü jang lema agütsüba aser ki o jen balala yangluba indang osang agütsü.

Mission Organic Value Chain Development for North Eastern Region (MOVCD-NER) kübok department-i Western Angami cluster nung Zubza, Kiruphema, Sechuma, Mengujuma, Jotsoma, Khonoma, Mezoma aser Thekrujuma densema Sechu-Zubza Block kübok yimtsüngtem nung ali hectares 500 nung certified persimmon cultivation tenzükogo ta ashi.

Department-i Pradhan Mantri Krishi Sinchayee Yojana (PMKSY) aser Rashtriya Krishi Vikas Yojana (RKVY) kübok maparen balala inyakba indanga osang agüja liasü.

Iba sülen Regional Transport Officer ajanga National Road Safety inyakyim indang osang agütsü aser 2018 nung Government of India-i tenzüka Good Samaritan guidelines indanga lemsatepa liasü.

Motor Vehicles Act kübok hit-and-run lendong dak sendakba nung teyari agütsüba indang lemsatepdang, hit-and-run lendong nung asüba asoshi kinunger nem compensation sen lakh ana agütsür aser kanga sashia yirur alir nem sen 50,000 agütsür ta ashi.

Chiephobozou nung arem shiti adoka timtem agütsüba asoshi Chiephobozou EAC dang tensa meita district administration nem osang agütsütsü tuyua liasü.

Uttar Pradesh nung IAF tayimtsü ka tsükok



January 21, 2026 nü Uttar Pradesh kübok Prayagraj nung Indian Air Force (IAF) indang training tayimtsü ka awatsüing ka nung tsükokba sülen tangokba noksa nung angur. Iba lendong nung pilot anaprong kümzük.

New Delhi, January 21 (Agencies): Bodhbarnü Uttar Pradesh nung Prayagraj kübok Rambagh nung Indian Air Force indang training agiba tayimtsü tilaka tsükok, ajisüaka iba lendong nungjagi pilot anaprong kümzükogo.

Bodhbar nikongdang 12:30 ako meta Air Force Station Bamrauli nungi apusoba tayimtsüji Rambagh area nung aliba tzübo ka nung tsükok.

Iba tayimtsüji emergency parachute ka kübok tsükokba video ji kari tangoka social

media nunga prok. Parachute aliba ajanga tayimtsüji kangabo meraksa.

Iba tayimtsü ya talisa airfields nung ozü senzüsempogba mita reprangtsü atema lir. Iba tayimtsü nungji Vayusena Medal angur aser Air Force Station Bamrauli nung Chief Operating Officer, Group Captain Praveen Agarwal aser station Chief Administrative Officer Group Captain Sunil Kumar Pandey na liasü.

Iba lendong nungjagi

tenaprongla kümzükogo, ta Defence PRO Wing Commander Debartho Dhar-i metetdaksü.

Tayimtsü nung timtem adokba bushisüngdangtsü atema IAF-i Court of Inquiry tuyuogo.

Tan ita kija nung tayimtsü ana tsükoker. January 10 nüa Regional Connectivity Scheme (RCS) indang menden 9 aliba tayimtsü ka Rourkela airport nungi kilometer 15 shi pilar Kansor nung aliba moapu ka nung tsükoka liasü.

Tanü 'MGNREGA Bachao Morcha' National Conference agitsü

New Delhi, January 21 (Agencies): Bodhbarnü Congress-i, MGNREGA agienba ajanga nüburtem temeden rakzüker, ta shia linük tesem ajaklen mapa inyaktertem nem shilem agidakja iba onük atema jembitsü, ta metetdaksü.

Congress general secretary in-charge communications, Jairam Ramesh-i, 'MGNREGA Bachao Morcha' National Conference ji Brihostibarnü ayongzüka akatsü, aser iba sentong nungji Congress Tir Mallikarjun Kharge aser Lok Sabha nung Opposition lenir, Rahul Gandhi nati jembitsü, ta metetdaksü.

"Iba conference jakdang tanü linük tesem balala nung mapa inyaktertemi pepei mapa inyakba tesem nungi ali bener arudar," ta Ramesh-i X ajanga metetdaksü.

Rachnatmak Congress Chairperson, Sandeep Dikshit-i, BJP-i Act tasen ka- VB-G RAM G ajanga MGNREGA melenogo, saka Congress-i maneni ibaji anema nokdaker, ta ashi.

Paisa, states aser district aika nung 'MGNREGA Bachao Sangram' agidar, ta ashi.

"Covid wara mapang nung nisung crore aika atema

MGNREGA scheme ya pei tebok mesüa alitsü atema scheme ka liasü. MGNREGA ajanga atangji nüburtem melung koktetogo. Iba dak sendakba nung onoki aluyimertem aser aayangertem temeden atema inyaker organisation aika den o lemtepogo," ta Dikshit-i metetdaksü.

"Iba onük nung tebilemba lemsatepba mapang nung ajak tangatetba kasa dang liasü, aser ibaji- nüburtem temeden rakzüker," ta Congress leniri metetdaksü.

"MGNREGA atema jembiba sentong nung adentsü atema Brihostibarnü nisung aika adenshitsü. Item nisungtemi gari lenmang yanglutsü, schools, panchayat hall, tzübo aser tzü rizüingdak yanglutsü atema MGNREGA schema amshia liasü. Item nisungtemi mapa meranga inyakba ajanga linük yangerba nung tongtimbang shilem agiogo," ta pai ashi.

"Asüing iba sentong nung parnoki onok den shisa lemsateptsü. Parnoki MGNREGA mapa inyakba

tesem nungi ali tekapu kaka bener arutsü. Ali ajakji bendentsü aser longjemer takhangba agütsütsü," ta Dikshit-i metetdaksü.

SC-i Delhi nung mopung menenba nokdangtsü atema tuyur

New Delhi, Aenjeti/January 21 (Agencies): Bodhbarnü Supreme Court-i Centre sorkar, Delhi sorkar aser stakeholders dang Delhi-NCR nung Air Quality Index (AQI) tamajungba dang akümba nung ajemdaker central pollution watchdog-i benokba onüktem atema kechi inyak? ta asüingdanga hopta pezü tsüingda telangzüba agüjang ta tuyuogo.

Chief Justice of India Surya Kant den justices- Joymalya Bagchi aser Vipul M Pancholi nungeri akümba special bench-i Commission for Air Quality Management (CAQM) tenüing nung Additional Solicitor General Aishwarya Bhati-i agütsüba report asadanga liasü.

"CAQM-i onük 15 benokogo. CAQM-i benokba onüktem dak alia mapang talangka benoka inyaksü atema teinyaksütem alitsüa akok. CAQM-i benokba onüktemji memenoi mapa kuma inyaksü nüngdak. Anungji onoki stakeholders dang item onük dak sendakba nung parnoki kechi inyakaar report agüjang ta tuyur," ta bench-i metetdaksü.

CAQM-i, Delhi-NCR nung mopung menendaksüba tongti kuliji gari nungi adokba mokozü ajanga lir, ta metetdaksüogo. Hombarnü Supreme Court nem agütsüba report nung Commission for Air Quality Management-i ibaji metetdakja liasü.

"Asükwa mongpu mapang nung Delhi-NCR nung mopung menendaksüba tongti kuliji transport sector ajanga lir, iba sülen jana arongba aser auyi ajanga lir. Petrol, diesel aser CNG atsükba garitem ajanga mopung menentsür, talisa diesel garitem ajanga particulate matter, nitrogen aser sulphur oxides adokdaksür," ta CAQM-i metetdaksü.

Tamalen Supreme Court-i, Delhi-NCR nung mopung menenba nokdangtsü atema CAQM-i süoki ia meinyaker aser mopung tali menendaksüba kulitem jangjatsü atema aritepa meinyaker ama reprangteter, ta metetdakja liasü.



January 21, 2026 nü Patna nung 'JEE Mains 2026' exam agütsütsüpurtem examination centre ka kima teransena nokdaka aliba noksa nung angur.

India-i anünglen spy satellite 50 ayutsü

New Delhi, January 21 (Agencies): Yaküm Indian Army temi Operation Sindoor mapang anogo pezünü tashi Pakistan den raradang 'surveillance blind spots jangjaba nung ajemdaker India-i aonung tesem balala angutsü atema spy satellites 50 dak tali yoktsü, ta osang ka ajanga metetdaksü.

Yaküm May 7 nungi May 10 tashi Pakistan den raraba mapang nung tesem balala jangjatsü atema satellites kanga amshia liasü.

India nunger satellites ji aonungbo mesüra mepet alidakbo junga mamshiteti liasü. Pakistan ket nunga item ama satellites kar liasü saka parnoki China nunger teyari ajanga satellites ji kanga junga amshiteta liasü.

Ibayongji India-i US nung aliba company tem dang nungi satellite imagery alizüksüsa aküm. India-i electro-optical imaging amshia aliba nungi synthetic aperture radar agi melentsü. Ibaji ajanga aonung aser mepet aliba tesemtem nunga tesem balala jangjajanga angutsü.

Satellite-to-satellite data transfers atema inyaksangshi tenzükerogo aser mezüingbuba shilem nung the Space-Based Surveillance-3 programme kübok satellites 50 yoktsü.

"Asen arrtsütem kümzüka ayutsü atema asenoki satellites aika nüngdaker. Tang aliba satellites agi meperir," ta yaküm ISRO chairman V. Narayanan-i metetdakja liasü.

(Maneni tapak 8 nung...)



January 21, 2026 nü New Delhi nung BJP National Tir tasenba, Nitin Nabin (tiyong) den party office ketdangpurtem aser state Tirtem senden nung tangokba noksa nung angur. Kasa noksa nung BJP National General Secretary Tarun Chugh, National General Secretary Radha Mohan Das Agarwal, MP Aparajita Sarangi aser tangartem angur.



TIR YIMYIM YIMOBILEM (EDITRIAL)

DIMAPUR THURSDAY, JANUARY (AENJETI) 22, 2026

Naga nunger akoksadak

Yakanü Chümoukedima nung NSCN/GPRN (Khango / Hokato Vusshe) teloki Naga nunger business inyaker ka tenüing agi Kiyeto Zhimomi pua bener oa tarak keta merenshir sen lakh semer anogo pungo tsüingda agütsütsü tezüluba nung nangzükdaktsür chiocka tatalokba otsü yagi, Naga yimten tebilemtsü tatem küma melatetteti ayuba agi Naga nunger kong koma akoksar, iba noksa aser kuliji sayur. Tang NSCN telok kati Kiyeto pua merenshiba kuliji angadagra, parnok tsüingda Naga yimten nüchiso ken o nung mangatettep adokba mapa ka masü mesüra Kiyeto Naga yimten nüchiso bushiba mapa anema inyakba agia masü, saka Nagaland nung business inyaktertem dang nungi saru shitak sarua magütsüba ajanga mepelatep adokba ken o ka lir ta angateter. Aji oda, Naga lima nung Naga nunger yimten nüchiso bushir telok paikaya küma aoba ya taküm alitsü asoshi sen nüngdaker aser iba senji, akhi ama, Naga nunger kilen shia sarua agütsütsübaji tanübo tamakoktsü kümogo, anungji mesarur. Ajisüaka, Naga yimten nüchiso bushir telok paikaya taküm litetba ya, parnoka kar dang nungibo saru agia parnok nüngdak peridaktsür ta asenoki angateter. Ibaji kodang bilemdangdir, tanü Naga limasa süaka Nagaland akoksaba kuliji Naga yimten nüchiso bushir teloktem ajak ya Dimapur nung business inyaktertem dang nungi saru agiba ajanga taküm alir. Item business inyaktertemji Naga nunger masütsüa akok, parnokji teimbaka Marwari aser Bihari asütsü. Parnok yagi tangalen nungi Nagaland nung alirtem asoshi train aser gari nung chiyongtsü aser osettsüset bener arur aser item ajak nungji Naga nunger teloktemi saru agir aser bener arur tzümar business inyaktertem jagi menunngangi agütsür, kechiyong parnok atemabo kecha takoksa mali, aji dokan tonger asenok dang temloker ayoktsü. Atangji, parnok asoshia telok ter metsü nem saru agütsütsübaji tasak, anungji aiben timtem lendonga ajurur. Item timtem aser takoksaji paidoktsü atema tangbo Dimapur nung alir tzümar business tulutem ajak parnok khu ayudak godown Dimapur anasa Assam nung Khatkati nung yanglua lir aser tanga len nungi train nung khu bener arubatema Dimapur nung masü saka Bokajan train station nung dang agizüka bener atua Khatkati godown nungji ayur aser gari agi bener aruba khutema Dimapur tonga metui Khatkati godown nungsa ayur. Anungji, tangbo kisüjensüba osettema Dimapur nung masü saka Khatkati godown nungji dalangba angur. Aji oda, train nung Dimapur atema khu bener aruba linük saru aliba agi Dimapur train station nung magizüktettsüa akümba aser gari nung bener aruba osettema Dimapur tonga marui Dimapur among nung agizüka ayuba jagi Naga nunger rongsen aremer aser Dimapur tuluba aser tajungba renloka aotsü melen Dimapur yabo kibur maliba yimti amato tilaba aser tamajungba küma odagi. Iba ama linük saru aliba agi, Naga lima nung Naga nungertemi business meinyakteter, kechiyong yimten nüchiso bushir telok ter metsü nem saru agüja business inyaktüsbaji shisabolutsüka aser lendong keta lir, iba jagi, balaka asen nisungi business meinyakteter, kechiyong sen dang taküm taoba ta asenokibo angateta lir. Ajisüaka, tangar yamaji masü, taküm agi tendanga sen bushir, anungji sen bushi dang taküm samara ojang aser mesamara takar küma alitsü. Tanü Dimapur nung iba ama tetsüingda nung nisung aikati business inyaktertem o Naga yimten nüchiso bushirtem teloktem na tsüingda saru sarutsüba mapa inyaker. Item saru sarurtem rongnungji tsümartemia dena shilem agiba asenoki angashir. Tang NSCN telok o Kiyeto na tsüingda atalokba lendongjia iba ama mapa mesük inyakba nungi adokba tebilemtsü amai angateter. Iba ama tensa tia ka nung Nagaland nung Naga nunger business junga inyaka moutettsü. Joko, shitakba nungbo tanga state-tem nungi Nagaland nung alir nüngdakattem kechisa arur, item oset aser chiyongtsü bener arua ayokba business-tem ajak ya Naga nungertemi inyaktettsüla. Ibaji inyaktettsü atema Naga nungertemi Naga yimten nüchiso tenüing nung tangar dang saru sarua alitsü bilemba tangatetba nungi alemdanga oa bilemtsüla aser Nagaland nung ozüing yanglurtema ozüing raksar masütsüla.

OLEMSABANG

"SHI AKADANG ANGO AKA AMAI"

- Watimeren

(Iba Yimdangjem otsü ya Tir Yimyim aser Bookipedia nati ayongba toktep nung shilem agirtem)

(Yashi adok nungi...)

Oda, temeimtsüka merenba ba tetsü den la shirang yipden nLanlia !
"Tanü ya ni asoshi kanga tongtipang anogo ka lir, ni züluba mezüing kakat alima tangi tanü bener arur. Iba kakat ya oda züluba ka dang masü saka kü ayak lir , iba ya tanü asüing ka atalokba masü, saka küm metsürpungu tejaklen nungi tenzüka otsü lir ".

-Lanlia Küm metsürpungu tejaklen.

2000 Luroi 2 nung Khristan kibong ka nung jala ka aso, la asoba anogo , tetsü tenu tenüing agi Temjenba liasü , pai arua pa pungmang parnok dang ashi . Koma pa pungmang nung teboi la nem tenüing jatsüa liasu aser lai iba tenüingji mejara arishi malitsü ta ashi nung tetsübu aki sünger parnoki la dang Lanlia jatsü. Kodang la ena atu ajak asoshi temoatsü taküm ka ama ain . Tsürabur mapa nung teti senzüa ali nung , la anogo tem tetsü tantsüla denang monga ali . Lai item mapang nung sobaliba kenshi oshi aser alimar yimya jakla aika angazüka aru, La asoshi Tsüngrem ji tama aser la taküm nung tatok agütsübaji tongtipang tiba südaktsü.

Saka kodang la eina atu lai alimar tejangrabatem nung temulung agütsü tenzüka aser yamaji la tetsü tesayuba nungi pilaa ao.

La taküm jabujari agi asüing ,aser lai ibaji meratet alidang 2016 Aenjeti ita Dimapur yimtiba nung la temang nung tumor putet. Kodang mozüshiteter nungi iba osang aru, lai ali alua ajeb tenzüka , tsürabura temulung raksaa ya koda asü ta ratamata ali. Idangji Lanli-ai la akhi taküm bilemteta aru aser lai Tsüngrem dangi meyiatsu mulungtet. Ita teko tashi iba tashidak oli aruli ta mozu kidang surgery anaben tashi agia la iba tumor nungi kümzük . Aji oda iba ya la asoshi iba ya Tsüngremer lenmang nung jajaba tetenzük asu.

Tsüngremi moatsüba sempet aki lai Tsüngrem sentsuwangshitsü nangzük .

Küm ishika süia aodang, la kinunger ka kidang alitsu jembitep aser liyonga aru , kodangsa ki kiburi la dang o tako ashi lai tetsu tangtsulai la dang ashiba o ka sa bilemtet , "külar" (kechi masuar oda tokjang) ta asüba ji ya yimdangi arua anisüngzüktet. Otsülaji sür küm ana abensaka lai ashiba otem teti lanlia den ali. Mokokchung yimtiba nung la azüingdang lai medemer tajung kar yimtet aser parnokji la asoshi tenüingdaktiba mapang nung tiyarir tajungtiba asü.

2021 luchii ita Lanlia lar adianu aser tsürabur den ayongi kazüi ao, aser kodang parnok meyipa adokba mapang la ayongbang feet ter tema nungi tsük , saka Tsüngrem taohijisa tulutiba asü nung , la tekolak tera yiru aser teperem nung komo tilaka ao sung agi anak, iba dak alaka la kecha meyiru , anungji lai iba indang ya kuli asütsü nangzük.

Iba hapta Amungnü , lai sarasadema mapang tatsüka meshizüka la taküm kuli agütsütsü lemtet. Kodang la sentep sabang nung noktak Tsüngrem temeim lai anu tejangjaba kü la jebaa la takü küli ji agütsü.

Iba aonung lai telemtetba ka yamai aki " Taküm nung Tsüngremi koba lenmang kati aniaka ni pa yimli asoshi kü taküm ya pa osang tajung atema küli sür ka ama alitsü"

Aji zünga Lanlia la taküm kuli kakat 'Lanlia :Lajia taküm kakat ka dang' shibang.

Rongjui 11 , 2025

" Iba otsü ya odang rateta züluba kakat ka masü iba ya tetsür ka shiba arishi tatsü asütsü lemteter alimai aruba taochi kümzük , shiba tashitak balala alar aküm aser iba nungi sala , shiba lungma nung temang ajunga raksa asütsü aliba nungi kümzük , ibaya la taküm otsü lir. Iba ya Tsüngremer lenmang tajungtiba aser pai taochi ta jatsübaji temoatsü tulutiba ta kuli asüba otsü ka lir , tanü Rongjui 11 , 2025 Tsüngremi ni Lanlia kü taküm küm metsürpungu tashi aniba otsü alima tangi

"Lanlia: Lajia taküm kakat ka dang " ta asüba kakat bener arur . Yamaji süa otsü tembanger.

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Philippines Gospel Crusade nung nisung 17,000-i Khrista agizük



January 18, 2026 aonung Philippines yimtiba, Manila nung Home Free Global Crusade nung tangokba noksa nung angur. Iba crusade ya Pentecostal Missionary Church of Christ-i ayongzük.

January 21, 2026: Anogo ishika tejaklen Philippines yimtiba, Manila nung sayutsüngir, Jonathan S. Ferriol leniba nung Pentecostal Missionary Church of Christ-i ayongzükba anogo ananü crusade nung nisung 130,000 dak tema aden aser nisung 17,000-i Khrista agizük.

Home Free Global Crusades 2026 nungji Khristan kentener Taya leniba nung tekülem aser tetushi agia liasü aser Ferriol-i sayutsüngi.

Pentecostal Missionary Church of Christ (4th Watch)-i küm tepiyong crusades ayongzüka agir. Tamalen parnoki Milan, Singapore, Tokyo, Manila aser Cebu yimtitem nunga crusades ayongzüka agiogo.

Honibarnü (January 17) mezüng sentong nung nisung 60,000 aden aser nisung 7,050-i Khrista agizük. Kasa tesem nungjisa nisung 5,550 bapti.

Tanünübuba (Amongnu) sentong nungji nisung 75,000 aden aser nisung 10,250-i Khrista agizük aser nisung 6,425 baptia liasü.

Mezüng anogo sentong tembangba sülen osangbener den jembidang sayutsüng Ferriol-i, "Ni onük metembangi lia nisung aika sabangleni arua Khrista nem taküm bendanga agütsü. Onok ket nung baptiba 'gown' peria maliasü ajisüaka parnoki mejashii bapti.

Tsüngrem nem sentsüwangshi ajak agütsür," ta metetdaksü.

Pentecostal Missionary Church of Christ-i, "Manila nung Tsüngremi mapa tulu inyakogo. Pa O ajanga nisung aika melung nung kongshi, tasüngdangba aika langzü, tanela aika asentenshi aser Khrista atema tanela aika anir aru," ta metetdaksü.

Khrista osangtajung kentener Taya leniba nung tekülem aser tetushi agia liasü. "Oceans (Where Feet May Fail)" ken atenla Taya leniba nung tekülem aser tetushi agiba ajanga nisung aika temoatsü ngua liasü.

Taya-i social media ajanga, "Home Free nung nenok den longjemer Tsüngrem külemer: Global Online Crusades ya jangratemtsüka lir aser Tsüngrem den mapang tajung lir. Nisung aikati pei taküm nung tongtibangtiba telemteba agiba ngua pelar. Aikati sabangleni oa Yisu nem bendanga agütsü," ta metetdaksü.

Ferriol ya OMCC (4th Watch) nung Chief Executive Minister tasenba lir. Iba Arogo tentetsang tebu, Arsenio T. Ferriol süadokba sülen pai tebu melenzüka liasü.

Iba Arogo ya tebu Arsenio aser tetsü Leticia S. Ferriol nati tenzüka lir.

Coronavirus wara mapang nung Ferriol-i nüburtem den Khrista osangtajung

lemsateptsü atema moaputem nung outreach sentongtem ayongzüka agitsü telemteba agia liasü, ajioda pai Home Free Global Crusades ya tenzük.

Tesüiba küm asem tsüngda parnoki ayongzükba crusade 14 nung nisung million 89 den Khrista osangtajung lemsatepogo aser nisung 105,000 dak tali baptiogo.

Manila nung crusade tembangba sülen Ferriol-i, "Tsüngremi iba sabang agütsüba ajanga ni kanga moaogo. Pa tashi tulu ajanga Pa Chir, Yisu Khrista osangtajung Manila nung nisung meyrjang aika den lemsatetogo," ta metetdaksü.

"Ni puti otsü mesüra inyaktetbatem mezüngshir. Tanela aikati osangtajung angashia temenen nungi kümzüksü atema dang ni bilemer," ta pai metetdaksü.

Ferriol-isa, "Tsüngrem matsüngdang ni shiba? Kü ket nung kecha mali, ni tazüngla. Ajisüaka Nü taochi ajanga ni ama nisung kati Nü tenüng nung jembir," ta metetdaksü.

Pentecostal Missionary Church of Christ (4th Watch) tesayuba kar nung ai-aura makar Khristantem-a lir, ajisüaka iba denomination yagi tekümtet angutsü aser Tsüngrem yimli nung adentsü atema Yisu Khrista ajanga tanaben asotsü sayur.

Khristantem anema tesempa o jembiba shilem 41 agi teimba kümogo

January 21, 2026: 2025 küm India tesem balala nung Khristantem anema tesempa o jembiba tatalokba 162 liasü aser ibaji 2024 küm den medemdangra shilem 41 agi teimba akümba lir, ta Center for the Study of Organized Hate (CSOH)-i metetdaksü.

CSOH indang project The India Hate Lab-i, yaküm India tesem balala nung tesempa o jembiba tatalokba 1,289 liasü aser iba nungjagi Khristantem

anema jembiba tatalokba 162 liasü, ta metetdaksü.

2025 küm linük nung tesempa o jembiba sentong ayongzükertemji organizations aser informal groups 160 dak tali liasü, ta IHL report ajanga metetdaksü.

Item ama sentong ayongzükertemji teimbaka Vishwa Hindu Parishad (VHP) aser Bajrang Dal liasü (sentong 289), iba sülen Antarrashtriya Hindu Parishad

(sentong 138) liasü.

IHL-isa, tesempa o jembiba 308 bo tashiyim amshitsü atema tayongzükba otem liasü, tesempa o jembiba 136 bo raraba hadir amshitsü atema tayongzükba, tesempa o jembiba 120 bo loktiliba nung jendoktsü tayongzükba liasü.

Tesempa o jembiba 276 bo mosques, shrines aser Tenla kitem raksatsütsü mesüra aienshidaktsütsü atema tayongzükba otem liasü.

ANOGO ABEN TSÜNGREM DEN

Tebui tajungtibaji metet

"Kibubai temeshibatem tatidang nungi koda kümzüksü, aser memeshiba tem koda o bendangba anogo asoshi ayutsü Pai metet."

2 Peter 2:9,10

Kodang tanuri tebilemtsü ajurudir asenoki yakta yaria iba tebilemtsü bentettsür. Saka asen kotaker Tebui yamaji meinyaker. Ken ken asenoki Tsüngrem dang Pa teyari yakta yoktsü mepishir, saka Tsüngremi tiaji asenoki koma agizüker mita dang alir. Peteri iba shiti ya timtem nung alirtem dangi zülu. Parnok rishikangshi nung liasü. Aika ki aser rongsen samadok aser parnok lima nungi aridok. Parnok Turkey lima nung jenoka ali. Iba mapang nung Peteri Tanela Temeshi-i ajungshia ya zülu.

Kibubai parnok timtem nung jagi kümzük asü masü, parnoki timtemji aremzük. Pai asenok tatidangba ajanga kümzüker, majurutsüba masü. Kibubaji ochi o bendanger aser Pai tamajung pur merenshitsü asoshi Tsüngremi rizünga akaba nung merenshi. Saka parnoki aibelenba putetli dang Pa memerenshi. Kibuba taremzük agi talangka atar. Item tamangertem kechi agi tasü itdaktsü süra Kibubai ajak azüoker ta parnoki meteta aliba agi parnok tasü itdaktsü. Kibubai anebaluba atena ora kecha maka. Pai tesülen nungi Pa sentsüwangshi aser asenok ajungtsü asoshi inyaker. Aikati taremzük meli-i Kibuba dang yakta kümzükang ta ozüng agütsür. Kümzüksü melen Pa taochi den sütepa aintsü asoshi tatidangba nung wazüka ayur. Kibubai koda kümzüksü meteta lir. Kobika sarasademdir sarasademang, Kibubai asenok asoshi tajungtibaji meteta lir.

Maharashtra nung Khristan kibongtem amak

January 21, 2026: temelung ulushir maneni Maharashtra state nung Khristantem amokmeren, ta Gadchiroli District kübok CSW-i metetdaksü.

Midapalli yimdak yimdaklirtemi January 14 nü police-i iba Khristan kibong trok amak aser ki pezü bendoktsüogo.

State nung Khristantem kanga amokmerener aser Khristantem anema inyaker, ta Christian Solidarity Worldwide (CSW)-i metetdaksü.

January 11, 2026 nü yimdaklirtemi Khristan kibong trok (Khristan 25) dang Khristan yimsü tokjang ta shia amokmeren, ajisüaka Khristan kibongtem jagi memelung.

Tasüngnü yimdaklir 20 dak temai Khristan kibongtemji amak aser maneni parnok dang Khristan yimsü tokjang, ta ashi, ajisüaka Khristantemi memelungba agi lokti jagi Khristan kibong pezü ki raksatsü.

Iba sülen Khristantemji Kavande Police Station-i oa police dang teyari meshi, ajisüaka police-i yimdaklirtemji dang pusem. Police ketdangsertemia Khristan kibongtem amokmeren aser parnok indang tribal identity cards thinenttsütsü aser ration supplies magütsütsü, ta ashi. Police-ia yimdaklirtem ang pusemba ajanga yimdaklirtem

temelung ulushir maneni Khristantem amokmeren, ta CSW-i metetdaksü. January 14 nü police-i iba tesem nungji aliba pastor jaokba sülen pa dang asüngdangya. Parnoki pastor dang Khristan kibongtemji mesemdangtsüla, ta tuyu.

Tang Khristan kibongtemji ki teraksa nungji timtema lidar.

Iba yim ya kanga tezülen aliba ajanga teyari angutsü tasak. Khristan kibong trok jagi District Collector ajurua ken o benoktsü tebilemba lir.

CSW tentetsang aser Tir Mervyn Thomas-i, "Yimsü nung ajemdaker Khristan kibongtem mezügmeshiji khenyongi magizüktettsüla. Ano külen police-ia item senso kümzüksü atema meinyakbaji tesüngmangtsüka lir," ta ashi.

Paisa, "Ibaji ajanga aibelenertem ano taliba temelung uludaktsü. Onoki district administration aser state ketdangsertem dang tangsa tiyongtsüi ia inyaktsü aser Khristantem kümzüksü atema akhanger. Parnok nem temeden agütsütsüla aser takoksa anguba atema temenok agütsütsüla. Aibelenertem nem temerenshi agütsütsüla," ta metetdaksü.

AO OSHI ANGAZÜKDAK:**TANÜ ANGAZÜKTSÜBA OJANG**

Tir Yimyim

Tulu**(adj)** tila masü (big)

* Ayong tulu nung ango tulu alir.

Tululu**(adv)** tulusa aika (all the big ones)

* Onoki ango tululu shiteta ali.

OLONG PAITEP # 7391

1			2			3			4	
			5		6		7			
8										
			9							
	10									
								11		12
			13				14			
15						16				

TIPLIN

1. Anenzükdak ki
3. Asür mangyimba
5. Temulung nung shisadang
8. T ____ lu
10. Takdang temalen
11. Tesa ____ a
13. Ajungbena temulungjang
- tongtonglatsü atu
15. Tejen lai nung tesayur
16. Tsüngsak-mopung

-

(5)

-

(5)

-

(5)

-

(3)

-

(9)

-

(3)

-

(5)

-

(5)

-

(5)

LANGTSÜNGLEN

1. Reprangdaksü
2. ____ ur
4. Kiojen yangludak
6. ____ ait
7. Nagaland nung ayong ka
9. Küm kasa purtem
10. Tetsüng tajemtdak
12. ____ adenshi
14. Tsünüsenbongtsü adokdak

-

(4)

-

(3)

-

(6)

-

(7)

-

(5)

-

(5)

-

(6)

-

(4)

-

(3)

OLONG PAITEP # 7390 TELANGZÜBA**TIPLIN :**

1. Aben, 4. Artsü, 7. Lisem, 8. Liwa,
9. Sarasadem, 12. Aket,
14. Mangu, 15. Anünü, 16. Ango.

LANGTSÜNGLEN :

1. Aruli, 3. Balala, 5. Suwar,
6. Belem, 9. Süjak, 10. Aonung,
11. Dokan, 13. Tinu.

NAI-A YA METETTER

Saudi Arabia kübok Hail province ajanga Guinness World Record tasen ka yangluogo aser iba ya "largest-ever off-road production car convoy" indang lir.

Saudi Tourism Authority aser Hail Region Development Authority ajanga ayongzükba sentong nung Saudi Arabia, Gulf aser Arab linüktem nungi nisung aika adenshi aser kilometer 7 unpaved desert trail nung car convoy oa liasü.

Manipur nung school sports contingent ken o bushisüngdang**Imphal, January 21, 2026**

(Agencies): Kangpokpi district kübok National Highway 102 nung Rajasthan school sports contingent dang nungi auyaba aser tashiyim agi sen meshiba ken o atema bushisüngdang tenzükogo.

Iba tatalokba indang social media nung prokshiba sülen bushisüngdang tenzük ta Youth Affairs and Sports (YAS), Manipur Director-i ashi.

Iba video nung asayar tebu kati parnok Kangpokpi district ajangdang ghonda ana jungnüa prangpong agi tuitar sota ayu aser

sen agütsü ta shia lir.

Züngsem 52 agi akümba Rajasthan contingent ya 69th National School Games Championships 2025-26 nung shilem agitsü atema aruba liasü. Iba asayamung ya January 14 nungi January 18 tashi Khuman Lampak Main Stadium, Imphal nung amung.

All Manipur Students' Union (AMSU)-i iba tatalokba aitsüogo aser iba mapa inyakterem aputsü takhangba agütsüogo.

National highways nung public safety alitsü atema lungkak

aittsü ta AMSU-isa metetdaksüogo.

Külen, Kuki-Zo nunger telok Committee on Tribal Unity (CoTU)-i iba ken o magizükba metetdaksüogo.

Tang tashi nung Manipur nung police station, security control room, mesüra law enforcement agency tsüngda ken o mesüra First Information Report (FIR) kecha benoka mali. Iba ya mebilemdangi aser tangatetba tamajung nung tai tongloksüba ka lir ta parnokisa aitsüogo.

Serchhip district nung ASF ajanga pungzü aika asü**Aizawl, January 21, 2026**

(Agencies): Mizoram kübok Serchhip district nung African Swine Fever (ASF) ajanga pungzü aika sür aliba nguogo.

Thentlang village anasa arem nung pungzü 20 shi sür aliba angu. Shiruru tasütem nungi tenüngla agiteta laboratory tests asüba nung ASF putetogo ta Animal Husbandry and Veterinary Department-i metetdaksü.

Yaküm December ita tetenzüklen nungi Thentlang tesem nung pungzü sür aliba

ngua aru ta yimdaklirtemi ashi.

March 2021 nung ASF wara adokba mapang nungi aiben pungzü sür aliba nguyonga arur. July 2022 nunga Champhai district nung arem ka nung pungzü tasü aika angu aser laboratory tests ajanga ASF puteta liasü.

Yaküm September ita nunga Kolasib district kübok Saipum village anasa pungzü kar süa lia angu.

March 21, 2021 nü Bangladesh arrtsü anasa Lunglei

district kübok Lungsen village nung ASF wara mezüng puteta liasü. Iba sülen nungi Mizoram nung ak 72,012 süogo aser 52,979 tashi tepsetogo.

Iba ajanga kibong 12,500 dak kongshiogo aser Rs. 1,011.27 crore shi akoksaogo.

Yaküm March aser December tsüngda ASF ajanga ak 9,711 asü aser wara azüoktsü atema ak 3,620 tashi tepset. Iba ajanga kibong 3,867 dak kongshi aser Rs. 114.64 crore shi akoksaogo.

Onoki ozüing alema arurtem bushitsü: Himanta Sarma**Guwahati, January 21, 2026**

(Agencies): Assam nung bendanger 14 tashi apu aser meyipa yokogo ta Chief Minister Himanta Biswa Sarma-i Deobarnü ashi.

"Sorkari border security aser

internal vigilance akangakanga inyaker. Iba mapa ya tanep züngia inyaker aser ozüing alema arurtem apu" ta Chief Minister Sarma-i ashi.

"Nenok atsüka alitsü akok saka onoki nenok bushitsü aser

India nungi meindoktsü" ta pai metetdaksü.

Assam state sorkari ozüing alema arurtem anema 'zero-tolerance' mapa inyaker aser Assam nung security atema ibala mapa maneni inyaksü ta Sarma-isa ashi.



Arunachal Pradesh kübok Longding district nung January 19, 2026 nü NSCN-KYA züngsem kati security forces tsüngdang temai adokba sülen agiba noksa ka angur. Iba nisung ya Akha (Khawang Wangsu) ta jangjaogo aser pa ya Longphong nunger lir.

**GOVERNMENT OF NAGALAND
DIRECTORATE OF SCHOOL EDUCATION
NAGALAND : KOHIMA
NOTIFICATION**

Kohima dated the January 2026

No. ED/EST/GR-IV/APPT/2025: In continuation to this Office's advertisement of even No. dated 02-12-2025, the dates of interview for the 9(Nine) posts of MTSunder the Department of School Education is hereby given below:

Date	Session/Time	District
04-02-2026	Morning Session (10.00 A.M onwards) Afternoon Session (01:30 P.M onwards)	Mokokchung Tuensang
05-02-2026	Morning Session (10.00 A.M onwards) Afternoon Session (01:30 P.M onwards)	Shamator (Roll No S-01 to S-20) Shamator (Roll No S-21 to S-40)
06-02-2026	Morning Session (10.00 A.M onwards) Afternoon Session (01:30 P.M onwards)	Shamator (Roll No S-41 to S-60) Shamator (Roll No S-61 to S-81)

The rejected candidate list is given below:

S. No	Name of Candidate	Roll No	District	Remarks
1	Shri. K Shokum	S-08	Shamator	Over aged

Note to candidates:

1. The interview shall be conducted at the Directorate of School Education, Kohima
2. All candidates are directed to reach the venue on time and are further directed to bring the Admit card issued by the Department (in original) along with their original documents on the date of interview.

(SHASHANK PRATAP SINGH) IAS
PRINCIPAL DIRECTOR.

Gaza indang 'board of peace' nung Netanyahu adentsü



Jerusalem, Aenjeti/January 21 (Agencies): United States Tir Donald Trump-i Israel Ato Kilonser Benjamin Netanyahu dang "board of peace" nung adentsü jaokba agizükogo.

Gaza nung war crimes mechi International Criminal Court (ICC) ajanga aputsü totuyuba agüja liaka pa iba sentong nung shilem agitsü, ta Israel lenir indang office ajanga Bodhbarnü social media nung sangdong.

Israel-i kin ajunga samatsütsüsa Gaza nung raraba tembangtsü atema Hamas den ceasefire agreement phase tanabuba nung shilem ka ama "Board of Peace" ya sangdong.

Alima nung lenir aika iba tentet nung adentsü jaoka lir, koba ajanga Gaza nung governance capacity-building, region nung tesendaktep, rara agi raksatsür aliba tanaben yanglushiba, investment attraction, senotsü jenti teyari agütsüba aser senotsü bendenba ketdang asütsü ta Trump-i ashir.

Ajisüaka Netanyahu shilem agiba yong iba board indang nükjidong mechi aikati tebilemtsü akaba tali akumtsü, koba Trump-i anitsü.

Region nung Israel tsükchir Turkiye iba executive committee nung inokba mechi taoba mapang Netanyahu indang office-i aija liasü.

War crimes atema ICC-i bushia alir iba board nung adentsü jaokba rongnung Netanyahu kisüing masü. Russia Tir Vladimir Putin iba board nung adentsü Hombarü jaok, shiba Russia-i küm pezü jungnüa

Ukraine nung raraba mechi ICC nung pa anema ken o benoka lir.

Putin ya iba board nung adentsü tejangraba ali asü maliar mejangjam saka Kremlin-i iba maongka asadangba mapang lir ta shiogo.

Putin tembar aser Belarus Tir Alexander Lukashenko-a Trump-i iba telok nung adentsü jaoka lir ta ashir.

Taoba mapang Netanyahu indang office-i executive committee ya Israel sorkar den amalitep mali aser par policy den mapet ta shia liasü.

Israel indang far-right finance minister Bezalel Smotrich-i iba board ya aitsü aser Israel dang Gaza tarutsü tia asoshi pei sasa mapa inyaktsü ayongzüük.

Board züngsem nungya UAE, Morocco, Vietnam, Belarus, Hungary, Kazakhstan aser Argentina dena lir. United Kingdom aser European Union indang executive arm-i parnoka jaoka lir saka telangzüba magütsü ta ashir.

Executive board züngsem nungya US Secretary of State Marco Rubio, Trump envoy Steve Witkoff, Trump jala kinungbo Jared Kushner, taoba British ato kilonser Tony Blair, Apollo Global Management CEO Marc Rowan, World Bank President Ajay Banga aser Trump indang deputy national security adviser Robert Gabriel nungertem lir.

White House-isa ano board danga ka, Gaza Executive Board, indang züngsemtem sangdonga lir, aser iba board

yagi Gaza ceasefire agreement phase tanabuba mapa kuma inyakba ketdang asütsü.

Davos nung World Economic Forum alidang Board of Peace indang charter züluteptsü Trump tebilemba lir ta osangtem ajanga ashi, kong pai Bodhbarnü o jembitsü lir.

US tiri Gaza nung kisüing masü saka alima tesem ajunga nung mepetmesü aser rara aliba bentettsü asoshi iba board tashi ulushitsü tejangraba lemsatepa lir.

Iba yongji pai United Nations melentsü pai imlaba indang jembiba mapa agi sayutsü meranger.

Mongulbarnü osangbener temi UN ya melentsüla asü ta asüngdang dang, 'UN ya maneni alitsüla, kechiaser teimla kanga tulu lir' ta Trump-i langzü.

Ajisüaka Board of Peace yagi amokbangtsü akok, kechiaser UN nungi teyari kangabo mali aser teimla aliba ama kodanga meinyak, ta pai ashi.

Yangji telangzüba agüja China indang Ministry of Foreign Affairs odongtar kati, Beijing-i UN tiyong südaktsüba international system, international law nung amendakba international order, aser UN Charter nung shia aliba ama international tesendaktep yimya kanga mulungsoa agizüker, ta ashi.

Board of Peace ya Gaza nung rara sülen raksar aliba yanglushiba maparen ketdang asütsü tentet, saka iba indang charter yagi par shilem ya Palestinian territory nung matemer ta osangtem ajanga ashir.

Iba board nung teti asoshi menden agitsü atema sen \$1 billion agütsütsü nüngdaker ta ashir.

Bodhbarnü Azerbaijan-i iba board nung adentsü jaokba agizükogo ta ashi. Ajisüaka Sweden bo shilem magitsü ta ashir.

Nigeria nunger sepaitemi pur or alir nisung 62 kümzükogo

Maduguri, Aenjeti/January 21 (Agencies): Nigeria nunger sepaitemi Kebbi aser Zamfara state nung meita aoba sentong blala benoka inyakba mapang telungpurtemi pur or aliba nisung 62 kümzük aser telungpur ana tepsetogo, ta army-i Bodhbarnü metetdaksü. Linük northwest nung tang telungpur telok balala anema jenjang agiba mapang ka lir.

Arem min nung amendaker aliba teloktemi northwest nung aiben nisungtem pua bener aoer. Item teloktem yagi yimtsüing, school, tekülemdak amaker, kong January 18 nü Kaduna nung tenlaki ana nungi nisung 160 dak tema pur aoba densema lir.

Army otongdar Lieutenant

Colonel Olaniyi Osoba-i ashiba agi, sepaitemi pur aoertem yua aliba tesem ka indang osang tejangja angazükba sülen Zamfara nung telungpurtem jenoka aliba tesem ka maka liasü.

Army-i ashiba agi, pur aoer parnok 62 kümzükogo aser parnok kinungertem den longjemdaksütsü atema tang tinyakdak lir.

T e l u n g p u r t e m senzisenpongba indang osang tejangja angazükba sülen tanga meita aoba sentong ka nung sepaitemi Kebbi kübok Augie district aser kidanger Sokoto na tsüingda Lakurawa telungpurtem mendanga ata liasü.

Nigeria sorkari Islamist telungpurtem ket nungi Nigeria

nung Khrista dak amangertem kümzüka meyuteter ta shia US tir Donald Trump-i parnok aitsüogo.

US nunger sepaitemi Khristmas anogo northwest Nigeria nung Islamic State pur maka liasü. Nigeria sorkari Khrista dak amangertem rishikangshi masür aser Islamist o telungpur telok balala yagi Khristan aser Muslim nunger civilian tem ajak kecha mebendangi amaker ta shiogo.

Army-isa, nisung pur aoba ken o tali küma aoba aser iba tesem nung security dak sendakba nung tensa mejungi akümba nokdangtsü atema tang jenjang agia aliba nung shilem ka ama iba meita aoba sentong benoka inyakogo, ta ashi.

TEPELA LEMSATEPER



Tasüba : 12-01-2026

Onoki teti meima aliba **Mr. Imtiyangba Ao** (Khar) shiranga yipden nungi tasü nü tashi kija, kibong aser lokti balalai ozü kibong den nübo aser rongsen balalai yaritepogo nenok ajak dang pelaba lemsateper.

Ozü-i nenok temeim aser teyari asoshi kecha meyipa magütsütetaka, Tsüngremi nenok ajak tali moajang ta ozü sarasadem.

~ Temeim Kinungtsü, Chirnur, Semchirtem aser Kinungertem.

ALI TAYOKTSÜ LIR

Old Showuba, four lane anasa (Kimong asem) Sq.ft. @200/- @160/- Kimong ajak nung jenjang terabo ajemtsü Tongteprateptsü : 9863826159 Kimong ka @7 lakhs.

Taoba South Korea PM küm 23 tepuokdak ayutsü



Seoul, Aenjeti/January 21

(Agencies): South Korea nung okadak kati taoba Ato Kilonser Han Duck-soo küm 23 tepuokdak ayutsü obendang agütsüogo. Pa ya taoba tir Yoon Suk-yeol-i martial law sangdongba dak sendakba nung osrkar anema inyaksangshiba atema aija liasü.

Han ya Bodhbarnü Yoon-i mapang tatsüka atema martial law benokba mapang haihaura ka-a teyari agütsüba atema aibelenba aser 2024 küm December iba iba mapang tiri military anidentsü asoshi ozüing agütsüba sülen South Korea indang temzüing ozüing dak ajemdaker cabinet senden ka ayongzüka mamaneba atema aibelenba ngutetogo.

Han-i, Ato Kilonser ama pa indang mapang aser khuret tatem tashi sentoka toktsü," ta Seoul Central District Court indang obendanger Lee Jin-gwan-i ashi.

"Iba jenjang agiba ajanga South Korea, meimchir temeden aser liberal democratic order maka tamang tia nung aliba putu dangi meyipa yoktsü ana nung liasü," ta obendanger yagisa shisem.

Okdak yagi Han anema obendang agütsüba sülen pa sota ayutsü tetuyuba agütsüogo, kechiyong pai kulitem raksa

entoktsütsü akok ta ashi.

Arishi küm 76 tain Han ya iba ken o nung aibelenba aliba nguteta tepuokdaki yokba Yoon indang cabinet nungi mezüingbuba züngsem lir.

Taoba Ato Kiloner yagi pa anema ken o benokba ya magizük aser ashiba agi, military ozüing benoktsü atema Yoon sentong aliba pai jelja memeteti liasü.

Taoba hopta okakdak kati Yoon ya martial law benokba, ketdangsürtem mapa inyaktsü tetsükdaksü agütsüba, official kuli kakettertem yanglushiba aser temzüing ozüing kübok inyakyim sülen manidakba atema aija küm pongu tepuokdak ayutsü obendang agütsüogo.

Kasa mapang nung Yoon ya martial law benokba dak sendakba nung tanga onüktem nunga aitsür lir. Special prosecutor katibo Yoon ya tasüba agi merenshitsü takhangba agütsüogo aser iba atema obendang ya taruba ita agütsütsü imlar.

Seoul nungi Al Jazeera osangbener Jack Barton-i ashiba agi, iba obendanga aya kanga tongtibang kechiyong martial law benokba dak sendakba nung indang indanga merenshiba ketdangsürtem rongnung Han ya mezüingbuba lir.

NAAnungi coach 2 Athletics CECS Level 1 Course nung shilemagidar

Aenjeti/January 21, 2026 (TYO): Nagaland Athletics Association nungi athletics coach ana World Athletics CECS Level 1 Course nung shilemagidar. Iba sentong ya Athletics Federation of India (AFI)-i ayongzükba lir, aser Janury 21 nungi 26 tashi SAI Netaji Subhas National Institute of Sports (NSNIS), Patiala nung agidar.

Coach ana ya Asakho aser Inoto na lir, aser tena ya athletics coach lir, shirnoki Pre-Level 1

courses takok ngua agiogo, anungji tena ya iba tetushi certification sentong nung shilemagidsü atema qualify süa liasü.

World Athletics CECS Level 1 Course-i AFI-i India kübok tesem balala nung agidar. Coach tem mapang tedangishiba kümdaktsütsü aser coaching methodologies tem ya World Athletics standards den liromedema kümdaktsütsü nükjidong nung iba sentong ya ayongzüa agidar.

Iba amala course nung

shilemagida ajanga athletics coaching aser Nagaland nung saisabong terenlok nung teyari agütsütsü.

Nagaland Athletics Association-i, coach aser official tem national aser international jenjang nung agizüka aliba course tem nung shilemagia professional terenlok atema maneni ajungshir, ta Nagaland Athletics Association Honorary Secretary Mhonsao Ngullie-i metetdaksü.

Australian Open: Alcaraz, Gauff, Medvedev 3buba round-i iogo

Aenjeti/January 21, 2026 (Agencies): Grand Slam trok koker aliba asayar Carlos Alcaraz-i Bodhbarnü Germany nunger asayar Yannick Hanfmann koka Australian Open tasembuba round tongtetogo.

Arishi küm 22 tain Spain nunger asayar yagi Rod Laver Arena nung iba asaya ya 7-6 (7/4), 6-3, 6-2 agi koka liasü. Pa tasembuba round nung France nunger Corentin Moutet mesüra America nunger asayar Michael Zheng den asayatsü.

Melbourne Park hard court nung Alcaraz-i tang tashi nung quarter-finals aden khen danga

asayadanga mali. Taoba küm pa Novak Djokovic-i tsükdaktsü aser iba masüdag Alexander Zverev-i tsükdakja liasü.

Kasa asayamung tetsür kija asaya tanabuba round nung America tsür Coco Gauff-i Olga Danilovic koka tasembuba round-i iogo aser tebur kija asaya nung Daniil Medvedev-i Quentin Halys kokogo.

Margaret Court Arena Gauff-i minute 78 nung dang Danilovic ya 6-2, 6-2 agi koka Australian Open tasembuba round tongtetogo. La taruba round nung külem America tsür Hailey Baptiste den asayatsü, shibai Australia tsür Storm


Hunter straight sets nung koka liasü.

Mannei Medvedev-i tanabuba round nung France nunger asayar Quentin ya ghonda asem asayaba sülen 6-7 (9/11), 6-3, 6-4, 6-2 agi koka tasembuba round-i iogo.

Tetsür kija asaya tanga ka nung Sabalenka-i China tsür qualifier Bai Zhuoxuan 6-3, 6-1 agi ayong ayonga kokogo.

La tasembuba round nung Russia nung asola Anastasia Potapova shiba tangbo Austria nungi asayar la den asayatsü. Potapova-i tanabuba round nung 2021 US Open champion Emma Raducanu tsükdakja liasü.

Indonesia Masters: Sindhu, Srikanth pre-quarters-i iogo



Aenjeti/January 21, 2026 (Agencies): Bodhbarnü Indonesia Masters nung India nunger asayar PV Sindhu aser Kidambi Srikanth nati pei tata asaya koka tanabuba round tongtetogo. Ajisüaka India nunger tanungba asayartemi takok monguteti tsükogo.

Fifth seed Sindhu-i asaya nung tongtibatang mapangtem nung kanga junga asayateta Japan tsür Manami Suizu 22-20, 21-18 agi kokogo. Tena tsüngda minute 53 asaya liasü.

Suizu-i game anaprongla nung la tatem tashi la kanga nongshia asayaka Olympic nung medal ana ngur alila yagi kanga dang tongtibatang mapangtem nung süngjemshir asaya-a game

anaprongla koktetogo.

Kasa mapang nung tebur kija asaya nung Srikanth-i kanga meranga asayarang world No.22 Koki Watanabe kokogo.

Srikanth shiba taoba mapang world No.1 asayar liasü pa tang 33buba nung lir. pai mezüngbuba game 21-15 agi akok, saka tanabuba game 21-23 agi makok, iba sülen decider ya kanga toktepba asayaba sülen 24-22 agi koka liasü. Tena ghonda ka ser minute 12 asaya liasü.

Iba asaya akokba sülen Srikanth tanabuba round nung fourth seed Chinese Taipei nunger asayar Chou Tien Chen den asayatsü, shibai Ireland nunger asayar Nhat Nguyen straight games nung kokogo.

Kiran George mezüngbuba round nung 17-21, 14-21 agi Indonesia nunger asayar Moh Zaki Ubaidillah-i tsükdaktsüogo. Tetsür kija asaya nung Akarshi Kashyap-i asaya kanga tashi ita tenzük saka 21-8, 20-22, 17-21 agi Denmark tsür Julie Dawall Jakobsen makok.

Tarep temeyoktep asaya nung Rohan Kapoor aser Ruthvika Gadde nata France nunger fourth seeds Thom Gicquel aser Delphine Delrue nati 9-21, 20-22 agi tsükdaktsüogo, aser Dhruv Kapila aser Tanish Crasto nata game asem tashi asayaba sülen Julien Maio aser Lea Palermo nati kokogo.

Mitchell-i Kohli ajateta No.1 ODI batter kümogo



Aenjeti/January 21, 2026 (Agencies): India nung ODI asayamung kanga junga asaya-a team takok dangi aniba sülen Daryl Mitchell teburtem ODI batting rankings nung temaba jenjangi tuogo.

Mitchell-i iba asayamung nung century ana atonga yangluba sülen rating points 845 ngua pa rankings nung No. 1 batter kümogo. Kohli shibai point 795 ngua lir, pa tanabuba jenjangi asepzüka luogo. Tena ya Ibrahim Zadran, Rohit Sharma, Shubman Gill aser Babar Azam nunger dang nungi kanga agi tejakdang kümogo.

Tang agi tanabenbuba Mitchell ODI rankings nung temaba jenjangi tuogo. Pa November ita anogo asem temaba jenjang nung aliba sülen Rohit Sharma-i ajateta liasü.

Mitchell-i India den asayaba mapang ODI century pezü yangluogo aser pai India den asayaba mapang century timtiba yangluba list nung AB de Villiers ka agi dang memenepi lir.

Afghanistan nunger Ibrahim Zadran-i point 764 ngua pai taoba India captain Rohit

Sharma ajateta tasembuba jenjang tongtetogo. Rohit Sharma-i rating point 757 ngua pa tang pezübuba nung lir.

Indore nung asaya kanga junga asayatetba sülen rankings nung temelenshi adoka liasü. Mitchell aser Glenn Phillips na senteper run 219 yanglu koba New Zealand atema ODI nung partnership timtiba yangluba nung tanabuba liasü. Phillips-i ball 88 nung run 106 yangluba sülen pa ODI batting rankings nung jenjang 16 tejakdangi tua tang 20buba nung lir.

Phillips all-rounders' list nunga jenjang 14 tejakdangi tua tang 31buba nung lir. ODI all-rounders tem rongnung Afghanistan nunger asayar Azmatullah Omarzai maneni temaba jenjang nung lir.

Bowler tem rongnung New Zealand nunger bowler Michael Bracewell jenjang trok tejakdangi tua tang 33buba nung lir.

ODI bowling rankings nung temelenshi kangabo mali aser Afghanistan nunger asayar Rashid Khan maneni temaba jenjang nung lir aser England fast bowler Jofra Archer tanabuba jenjang nung lir.

INDIA OSANG :

Tapak 3 nungi...

India-i anünglen spy satellite...

Paisa, "Taruba küm asem tsüngda satellite 100 nungi 150 tali bendenloktsü nükjidong lir. Ibaji ajanga linük tesem ajak mita repringtetsü," ta metetdakja liasü.

Satellites 150 shi yoktsü atema sen billion 260 indoktsü.

Sorkari iba project kera inyakdar aser taküm April ita tashi nungbo satellite 50 yoktsü tebilemba lir, ta osang angazüker.

Sen crore 26,968 indang Space-Based Surveillance (SBS) programme ya yaküm October ita nung Ato kilonser Narendra Modi-i aniba Cabinet Committee on Security-i agizüka liasü.

Item satellites ji Isro aser private Indian companies kari yanglutsü.

India-isa orbit nung spacecraft kümzüka ayutsü atema "bodyguard satellites" yangludar.

BILEMDANGANG

"Taküm, mapang aser rongsen kechisa asenoki azüokteter."